



Sud Bosne i Hercegovine
Суд Босне и Херцеговине

Broj: S1 3 Iž 043601 22 Iž
Sarajevo, 12.08.2022. godine

Sud Bosne i Hercegovine, u vijeću Apelacionog odjeljenja sastavljenom od sudija Zvezdane Antonović, kao predsjednika vijeća, Dinke Bešlagić-Čovrk i Mirka Božovića, kao članova vijeća, odlučujući o žalbi Husilović Adine, D., ..., izjavljenoj protiv Odluke Centralne izborne komisije Bosne i Hercegovine broj: 06-1-07-1-608-3/22 od 04.08.2022. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine, u nejavnoj sjednici, održanoj dana 12.08.2022. godine, donio je

R J E Š E N J E

Žalba se odbija.

O b r a z l o ž e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Opće izbore 2022. godine po podnesenim prijavama do 19.07.2022. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žaliteljicu odbijen je upis iz razloga što uz prijavu nije dostavljen validan dokaz o identitetu.

Žaliteljica je protiv navedene odluke blagovremeno izjavila žalbu navodeći da joj nije kjasno kako dokaz o identitetu nije kompletan kada je poslala obje strane vozačke dozvole.

Centralna izborna komisija Bosne i Hercegovine u odgovoru na žalbu predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 01.07.2022. godine, pravilno uočila da podnositeljica prijave nije dostavila nijedan od tri identifikaciona dokumenta Bosne i Hercegovine

koji bi bio validan dokaz o identitet, obzirom da je u skladu sa članom 9. Upustva o postupku slanja, prijema, obrade, arhiviranja i zaštite elektronskih prijava državljan BiH za glasanje izvan BiH elektronskim putem (Sl.glasnik BiH, broj 27/22) kao vjerodostojan dokaz o identitetu za birača koji privremeno boravi izvan BiH, a u vezi sa članom 3.15 Izbornog zakona BiH (Sl.glasnik BiH, broj 23/01 do 51/22), potrebno je da se priloži fotografisan, skeniran ili u drugom elektronskom obliku snimljen jedan od tri važeća identifikaciona dokumenta Bosne i Hercegovine, a dostavila je samo jednu stranu identifikacionog dokumenta i to vozačku dozvolu K. D..

Odredba člana 3.15 stav (1) Izbornog zakona BiH propisuje da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

Takođe, nakon obrade prijave žaliteljica je putem e-maila obaviještena da njena prijava za glasanje izvan BiH sadrži nedostatke. Nevedene nedostatke žaliteljica nije otklonila u predviđenom roku od dva dana, nego tek uz žalbu prilaže obje strane vozačke dozvole izdate od strane K. D..

Napomene radi, žaliteljici nije oduzeto biračko pravo za Opće izbore 2022. godine, nego samo mogućnost glasanja putem pošte izvan BiH, jer ista može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

**PREDSJEDNIK VIJEĆA
S U D I J A**

Zvezdana Antonović